

國朝文類

二十



國朝文類卷第六十七

神道碑

河東廉訪使程公神道碑

王思廉

元貞丙申正月十五日河東山西道肅政廉訪使程公以官壽薨于太原二月三日歸柩汴梁大德改元冬諸姪狀公行實來請銘按公諱思廉字介甫姓程氏上世洛陽人元魏遷兩河豪右實雲中三州因著籍東勝公處士諱某之曾孫贈少中大夫安定郡伯諱某之孫宣授沿邊監榷規運使解州鹽使諱某之子妣田氏公始知讀書從樞判白

公學故文筆論議皆有師法中統建元用太保劉
文貞公薦事裕皇子春宮服勤守恪特被眷遇
令監印宥省至元七年樞副合丹公以平章政事
領河南行省選署都事十二年轉同知淇州事力
辭養親繼丁外艱服除授東平路判官入拜監察
御史十六年出僉河東山西道提刑按察司事俄
遷河西隴右道副使徙河北河南山東東西兩道
未幾陝西行省舉公興元路總管明年進陝西漢
中道大使二十六年雲南立行御史臺擢拜中丞
今上嗣位改河東山西道肅政廉訪使公識見明

敏沉毅果斷筮仕之初年尚少言動有節望之儼然同列雖親密者亦不敢以狎褻及之由是見知時宰有都司之辟竭力參贊事有當行惟恐或後丞相史忠武公每加獎拔幕府有疑忠武公之徇公者時規取襄樊供億浩穰公視出納綽有餘俗初築新城於江北和糴以足兵食委公領其事倉廩未完米多露積一夕大雨諸相以爲憂使人覘公方安卧帳中召而詰之公徐曰敵人在邇常宜鎮靜縱有漂灑所損幾何不過軍士一日糧耳若中夜搖動衆心驚惑事變之來殆有不可勝言者

矣聞者躑之簡書之暇究心營繕舟車器仗靡不
犀利向之見疑者始以忠武爲知人公之世父治
書公金南渡後嘗爲監察御史正色立朝不畏強
禦及公嗣職既然有濟美之志彈奸臣阿合馬輩
不法至陷囹圄居之泰然其黨巧爲機穽卒不能
傷出僉提刑司事也平反糾擿不克殫紀其尤者
大同楊刺真等犯酒禁有旨誅之公以其罪不至
死論列數四其忠君守法如此其赴河北河南也
道彰德聞兩河凶歉民大艱食而官府徵租甚急
欲止之有司謂法當上稟不敢專擅公曰若循常

例比得請民已疲於勾呼矣即移文傳催然後申明省臺果獲蠲除僚友有當鞠獄鄴中而不果其行者公乃請代至則詳究本末盡得其情蒙湔洗者以百數二十年河北復飢民多轉徙于南朝廷遣使與汴梁官屬會憲司官于河上以扼之公與總管張侯國寶決議放渡既而列上亦賜允俞是秋霖雨大河清沁皆泛溢爲衛輝懷孟害公親乘舟臨視振貸全活甚衆水浸衛城不沒者數版適郡僚各以事出公與屯戍萬戶張公集軍民發倉廩修築隄防以捍其衝晝夜督促暴露城隅閱數

旬功始就至今大水不復爲患衛人德之興元命
下公欲辭時尚書省丞相桑哥擅權順指所及竭
蹙奉承親舊力勸之公以大夫人年將九十旁無
兼侍輦致弗克不聽章三上得告而後已嗣有陝
西漢中之行亦極力丐免杜門家食慈母孝子權
然一堂若將終身焉二十六年丁內艱哀毀過禮
見者傷之雲南去京師踰萬里朝議以爲振舉綱
維肅清風憲綏輯遠人非公不可乃起公或疑跋
涉勞苦且未終制公必不拜公乃曰前此三除昧
死陳請蓋以老母故也今當宣力絕域以贖前過

甫踰小祥即素服就道既莅事即戒敕典兵之官
牧民之吏主刑名司廩庫各謹爾職毋致人言自
是上下肅然一新舊染雲南舊有孔子廟朔望長
吏便衣拜謁而已教官雖設一無從學之士公乃
舉春秋釋菜之禮先於所治中慶府集行省臺以
下諸官百餘人公服以行禮事屬城化之有遺子
弟受業者公之不鄙裔夷推誠敷教又如此河東
地瘠民貧仍遭旱暵公奏除歲餉親王馬駝十之
九所輸租稅易遠倉爲近倉以便民歷年積弊前
政欲去而不得者下車未久蕩洗一空鄰境之人

亦知嚮慕竟用是得疾公頻居風憲剛稜疾惡恒以古人自期晚年言事尤切直如早建儲貳以固國本訪求賢俊用贊丕圖車服辨尊卑之差封謚表忠勤之實養軍力以備邊定律文以革弊皆急務也使節所臨擾民不急之役必先禁止農桑庠序檢灾戕盜尤所盡心至忘飢渴寒暑平居不事生產惡衣菲食無難色與人交愈久而情好愈篤不以貴賤爲輕重或有疾病死喪問遺賙卹禮意兼盡雖往反數百里亦不憚勞後仍爲之經理家事撫視子孫不少衰減其於宗族姻戚又所厚者

也恬於進取勇於爲義卧病太原未得謝猶力疾
視事一旦索紙筆作遺書寄弟姪翌日飲啖應酬
若平時客退易衣就枕而薨蓋剛大不屈之氣充
養有素故於死生之際明公如此僚吏士民涕泣
相弔如失私親靈輜所經皆盡哀致奠則公之爲
人槩可見矣享年六十有二夫人鄭氏婦道可稱
前公卒今夫人柏德氏臨潢之甲族也明悟莊重
持家有法一子牛童早夭三女長適尹氏二幼在
室以其年月日葬公于某處先塋之次禮也銘曰
烈烈程公出遭盛時儒素世家孝友天資揚歷中

外才可吏師霜凜烏臺風生憲司去惡如草遇民
如兒捍患禦留奚翅已私事不辟難去必見思用
夏變夷悅禮敦詩惟是頑獷化而柔怒萬里來歸
兩鬢不絲養吾浩然豈其餒而望公廟堂決疑龜
著命也奈何竟止于斯有韞于中未究設施不能
不蛇賢人嗟咨有魏者碑銘以昭之公有遺恨余
無愧辭

故宋文節先生謝公神道碑 李源道

天訖宋命 皇元一四海而統之至元廿三年行御
史臺侍御史程鉅夫以宋遺士三十人薦于朝於

是江東謝枋得在舉中被徵丁內艱辭亡何連詔
江浙行省丞相蒙古台江西行省左丞管如德召
皆不起廿六年春正月福建行省參政魏天佑復
被旨集守令戍將迫蹙上道廼行夏四月至京師
不食死春秋六十有四八月子定之奉柩還廣信
明年九月葬其鄉之王亭麓原其門人誄而題之
曰文節先生謝公墓先生曾祖彥安祖一鶚考應
琇潯州僉判妣桂氏封碩人先生諱枋得字君直
信州弋陽人宋寶祐乙卯薦于鄉丙辰試中禮部
高等比對力詆時宰閹宦奮不顧前後抑置第二

甲第一人初潯州君以事忤使者董槐被劾以死
先生既第董槐執政竟不堂參以歸丁巳召試教
官調建寧府教授己未趙葵宣撫江東西辟爲屬
尋除禮兵部架閣令募兵援江上出楮幣十萬賈
得信撫義士數千人以應宣撫司罷賈似道當國
會暈輿出入簿責任事者公毀家以庚不足坐廢
至元初長星竟天踰月我師壓江上宋社日替江
東漕司猶試士徵較藝先生憤賈竊政柄害忠良
誤國毒民發策十問槌其喪極言天心怒地氣變
民心離人才壞國有亡證辭甚剴切大拂賈意臺

評竟上其謗訕鑄兩秩興國軍安置因謫所山門
自命疊山守令皆及門執弟子禮丁卯以史館召
先生曰似道餌我也不赴閉戶講道門之者翕如
若周岳熊朝余安裕楊應桂余炎謝禹莫若輩皆
知名介然自將足跡不及權門里中人行事或不
循於理者輒曰謝架閣聞乎有持兩爭必來質平
遣以理無秋毫假與人意人亦高其風必自審乃
進非義者未嘗敢至其前也乙亥連以史館校勘
祕書省著作郎召宰辭授江東提刑總其兵以守
饒信撫與王師戰輒敗不能軍遂易服負母走閩

中隱於卜信守將悉捕公妻子弟姪送建康獄夫
人李氏有容德有廉帥者欲妻之一夕自經死弟
某某姪某某及一女二婢皆死獄中惟二子熙之
定之移獄廣陵得釋又有弟禹在九江亦以不屈
斬于市先生資嚴厲雅負奇氣風岸孤峭不能與
世軒輊而以天時人事推宋必亡於二十年後抗
論儉宰老竭蹶不售終不取合於時其爲人蓋如
此及程公之薦報書廼曰弓旌招賢輪帛迎士有
志經世者孰不興起及非其人非 皇帝夢卜求
賢之初意也觀其言非徒決於剛憤者少力學六

經百氏悉淹貫爲文章偉麗卓然天成不踐襲陳
言宿說論古今成敗得失上下數千年較然如指
掌尤善論樂毅申包胥張良諸葛亮事常若有千
古之憤者而以植世教立民彝爲任貴富賤貧一
不動其中其言曰清明正大之心不可以利回英
華果銳之氣不可以威奮其自信率此類先生之
北也貧苦甚衣結屨穿行雪中人有嘗德之者賙
以兼金重裘不受平日所著易書詩三傳行於世
雜著詩文六十四卷翰林學士盧公摯爲之序引
深所推激夫人李氏男三義勇早卒熙之歸自廣

陵亦卒定之賢而甚文累薦不起孫男二信孫仁
孫先生死之二十有四年門人虞舜臣率其徒築
室買田祠公弋陽之東江浙行省請于朝爲疊山
書院又五年予在集賢待制番易周應極狀其事
致定之之語求銘墓道嘗謂先生天下士源道仰
其文章風節蓋四十年而不一識是區區者尚可
辭哉銘曰

嗚呼先生生也何時生也後時日薄崦嵫維南有
孽龜玉毀折我朝天明廼完其節鷄鳴風雨歲寒
柏松伊其板蕩古有盡忠道統旣闢人文斯一有